

黔陽縣志卷之十八

學校二 附鄉飲酒

師生員額

教諭一員訓導一員

康熙三年裁教諭十九年復設

廩膳生員二十

名增廣生員二十名附學生員不限額歲科兩試每

次取進十二名

按從前亦增取獠童名曰獠生康熙五十二年湖廣學院薄有德題

苗獠另編字號於額外酌取一二名嗣每考增取一名雍正三年湖南巡撫王朝恩以額少人多題

各屬苗獠於額外增取三名自是每考定取三名至八年科考獠童無人應試獠生歸本縣學九年歲考

復增取三名十年科考以後仍無應試者武生歲科併試取進十二名歲

黔陽縣志

卷之十八

學校二

十五

龍標藏板

貢二年一貢拔貢定例遇拔貢年選拔一名

學田

一土名中方乾溪田四畝四分納租谷八石八斗

一土名豹子坡羅家冲等處田三十四畝七分納

租谷六十六石

一土名竹坪田一處納租谷十石曾姓捐出

一土名桃子冲松樹脚李家盤水底壠等處田

糧

尙未查清納租谷十二石六斗楊宗仲等捐出

乾隆十年案

文昌閣原在崇聖祠右乾隆十三年建二十二年知

縣柯支樹移建北門三十四年署知縣宋溶復移置東關外三星坡結構崔巍奎光臨照文星遂稱得位

范孟瑄新建文昌閣記斗魁戴筐六星為文昌說者謂有神焉

且實以人迂誕極矣考史記天官書文昌六星一曰

上將二曰次將三曰貴相四曰司命五曰司中六曰

司祿秀水朱氏謂古之祀文昌者司中司命而今之

號為帝君者蓋司祿也其說為近是然世之祀之者

搏土刻木綠衣烏幘以是為神固所在皆是矣黔陽

文昌閣舊建在崇聖祠右迂迴偏仄方位未得其宜

黔陽縣志

卷之十八

學校二

十六

龍標藏板

邑人士夙欲更之未逮也歲丙子冬邑侯碧川柯公

以名進士新蒞茲邑展神祠怒然病其未稱爰周廻

審視卜地於城北門內之稍西形勢軒爽詢為黃姓

閒地其紳佩好義者樂捐其半餘則給貲以償其貧

者侯乃首出俸錢以為之倡諸紳衿耆庶咸踴躍輸

助涓吉鳩工數月而茲閣以崇又闢其東西兩楹為

諸生遊息地余因嘆黔人士之急公而賢侯之加意

振興真能相與以有成也夫禮言辨方正位詩稱相

其陰陽茲閣之建翼翼然方位得其宜矣尙望此都

人士互相砥勵期不負賢侯培植之意夫然後帝車  
之次芒角吐焉俾彼文昌行見佑我髦士矣是役也  
始於乾隆丁丑七月以十二月竣工董其事者司訓  
歐陽先生曰枚暨一潘君亦槐蔣君方蓋等余以  
公車遠出未得一窺一方意甚歉然爰拜手紀其略  
而列諸捐助姓氏於左以告後人

朱溶改建奎  
文閣小引

蓋聞佩桂香於月窟祿自天申占蓮夢

於風簷文凝神助朱衣點後詞賦無雙紅絹遮來科  
名第一凡居藝苑才半授於仙靈但號儒宗命總司

### 黔陽縣志

卷之十八

學校二

十七

龍標藏板

乎星象黔邑之有奎文閣也建肇國朝地居北坎

左縈右拂未協羅經後擁前環亦乖方位自薨題之  
始作遂簪笏之頓衰欲改築以無資甫下車而深念  
夫紅蓮湖畔水綠如油赤竹峰頭山青似黛乾符鬱  
結藍田本孕圭璋坤軸靈竒華嶽自藏虎豹又况盈  
囊錦繡幽情寄綠野之篇溢案烟霞逸調播月圓之  
句讀楊王之射策綾餅猶香數廖宋之登科爐煙尙  
裊刀圭不遠豈川原遽竭其菁華冠蓋維稀或建置  
實造夫風水歟長吏注近眉山幼居錦里讀書浣花

溪下菊淡如人從政欄木山前心閒似水弦歌聽去  
期成棫樸之風殿角移來聊助菁莪之化爰咨衆議  
敢布私悰旣舊貫之難因亟新宮之是卜誰無子弟  
不裁科甲之根苗共此心腸忍聽文章於氣數所願  
解囊解橐數集毛詩攻木攻金成同文囿則飛丹聳  
翠歡聲騰金碧之觀耀彩流光瑞靄繞紫薇之座行  
見神庥永錫篤生者無非繡虎雕龍而文運宏開奮  
起者悉屬翔鸞翥鳳矣是爲引

唐廷佐祀  
文昌會序

黔邑文昌閣舊在文廟崇聖祠右左爲奎

星閣乾隆二十二年邑令柯公支澍合建於北關內  
三十四年署令宋公溶以謂文昌星占紫微垣天府  
離宮也一日東壁例應擇城東地之爽塏者庶幾上  
應元象今非其位黔邑科名偃蹇未必不由於此爰  
約諸紳士買地擇吉鳩工庀材不數月告竣卽今東  
關外三星坡之文昌閣是也越十年己亥庚子兩鄉  
試科名接發歌鹿鳴者四人以余之陋而亦與焉信  
乎文昌司祿應焉如響今歲又當大比余叔漢三廖  
子岸于高子異三韓子楚三偕同人醵金爲會取息

以供祭祀而問序于予攷之周禮大宗伯以禋祀祀  
昊天上帝以寔柴祀日月星辰以禋燎祀司中司命  
夫司中司命爲文昌第五第四星民受天地之中以  
生中者性之德也五服五章天之所以命有德也易  
象言天命者二義皆取乎尙賢大有曰遏惡揚善順  
天休命鼎曰正位凝命所謂善與正者無他焉中而  
已矣民能還其所受之中是以自天祐之言無不利  
吾邑頗多材俊能文章若非崇其天爵兢兢焉仁義  
忠信之是修而惟辨正方位巽司祿者之繼明照焉

黔陽縣志

卷之十八

學校二

十九

龍標藏板

其可得耶其可得耶方今

聖天子壽考作人昭回雲漢諸君子春秋瞻拜神像果無  
慚降衷之所命於以禋燎棧樸不虛耳是爲序乾隆  
癸卯二月也

龍標書院原稱義學康熙五年知縣張扶翼建城此  
雍正八年知縣王光電因龍標山之舊文昌祠倡邑  
中紳士捐建扁其堂曰鹿洞遺規不時親詣課讀乾  
隆十二年西城外學宮復移龍標山即留正齋官衙  
改爲義學三十年知縣范清瀨建牌樓額曰龍標書

院歲久朽敝四十九年知縣姚文起捐俸建造門堂  
房舍悉易而新之視舊制彌恢而峻延師訓課文學  
日隆

書院田

一土名謝家壠得買彭日魁田十九畝四分零納  
租二十四石

一土名尖岩寨脚得買向啟昌田五畝零納租十  
三石

一土名冥水壠得買向信昌田六畝有零納租十

黔陽縣志

卷之十八

學校二

二十

龍標藏板

四石二斗

以上三處係乾隆十九年知縣柳秉謙  
率闔邑為育嬰堂置三十五年知縣宋

廷棟據紳士呈請撥歸  
義學用充山長修資

一土名陳家園窰瓦頭牛欄冲得買危人健田十

一畝五分納租二十二石

此項係乾隆四十二年  
知縣葉夔麟變育嬰堂

積谷併收危露胡必和  
蔣日旦等捐項置買

一土名社鬼冲危成安捐出田一畝三分納租三

石二斗

一土名稠木冲危人吉危人勝捐出田共五畝納

租七石二斗

一土名牛欄坡向時藻捐出基地田畝茶山墦地  
一處納租錢一千六百文

一土名唐家界得買唐義銓入官田六畝三分三  
厘三毫五忽納租谷二十五石  
此項係乾隆五十年入官公項奉文

變價解司知縣姚文起捐俸置買

一土名界牌田潘士璽捐出田四分二厘納租谷  
一石八斗

一新南門內長街左邊店地一所納租銀六兩

一書院右邊舊學宮地納地租銀一兩六錢

### 黔陽縣志

卷之十八

學校二

二十一

龍標藏板

一北門文昌閣舊基地納地租銀六錢

張扶翼義學記略

撫部三韓周公撫湖陽五載百廢俱興尤

屬意於人材既以學宮為興賢育才之本令郡縣有  
司歲時修治以示廣厲又念學宮之地名在庠序者  
得入而觀摩之不得其門而入者不與也非所以廣  
教思示無方也夫治之盛也國無異政家無殊俗士  
無私學一道德同風俗而人皆可才才皆可用亦在  
乎教之而已矣於是令郡邑有司所在創立義學俾  
邑之庶士民之秀良者悉得升焉時可謂至矣奉檄

之日知縣張扶翼聚其邑之廣文與其紳士卜基於北城之陽爲舊司地區其中爲講堂間其兩端以居師長垣其外以屏而囂室其四周以待來者考課有法獎掖有方修游有所庖厨有具其建築也於五年陽月之望方是時也縣舊有敷政堂後燬於兵燹余方出俸薪庀物材門堂悉具待舉有日矣適值茲命乃移建焉故不煩民力不稽時日旬月之間門堂垣墉煥然悉備其材夙戒豫故也厥工告成其師與弟蒸然竝進濟濟於堂翼乃揖諸生而告之謂夫入此

黔陽縣志

卷之十八

學校二

二十二

龍標藏板

門者必喻於義而遺乎利言孔孟之言志聖賢之志勿營溫飽以自下亦勿守咫尺以自隘庶幾文教昌明人材蔚起而足爲國家之用矣諸生勉乎哉

邑紳士義學碑記

今之義學昔之儒學也儒學曷爲義學是

榮歐陽二師變通爲之者也丙寅冬二師新鐸斯土下車詢義學何在邑人士對曰義學原在龍標山梓潼宮後久而廢今之生童肄業於育嬰堂歷有年矣二師笑曰育嬰顧可育士乎越丁卯歲奉撫軍楊大中丞檄飭移建文廟於城內衆議並學署遷之二師



云學署可以新構而義學不待創興盍卽留正齋公署爲之衆皆曰善二師於是率邑人士經營籌畫補之葺之丹之獲之增聯額於講堂植嘉木於環堵廳宇軒爽房舍整齊四顧岸芷汀蘭悉是眼前生意水光山色無非大地文章鼓篋之士濟濟彬彬坐明窓淨几莫不心曠神怡行見師道立則善人多文風日盛人材蔚起皆二師力也第後之視今亦猶今之視昔靡不有初鮮克有終興墜何常豈不在人願後之官斯土者能以二師之心爲心則斯文幸甚黔邑幸甚

黔陽縣志

卷之十八

學校二

二十三

龍標藏板

危元福重修龍標書院碑記

邑舊有寶山書院在赤寶山之麓其

始創之者爲宋饒公敏學其地而又復之者則明陳公鋼也郡志載饒爲朱門高弟子翊此講學黔士大化後以世易而地逮明成化間陳公鋼得什碑土中遂仍建於此陳後憂去尋卒邑人思之移故書院於城東隅祀焉嗟乎二公善政愛民爲名宦最而其於學也勤勤懇懇以是爲當務之急教澤在人馨香在廟有由然也自是以來時代更易而書院之名漸湮

國朝康熙間張公扶翼始於城北建義學雍正間王公  
光電移於龍標山之舊文昌祠乾隆十二年西城外  
學宮復移龍標山即留正齋官衙改爲義學三十年  
范公清瀨建牌樓始額曰龍標書院其在前時非不  
加之修葺塗飾可觀而材木非良風霜剝蝕良戾乎  
有棟折榱崩之患越壬寅冬適有我邑侯姚明府至  
侯以中州名進士出宰吾黔朝夕勤庶政而於學尤  
加意焉余自甲辰忝主書院講席侯時來視學每見  
垣頽瓦碎輒歛歔不自已乙巳秋乃慨然捐廉俸庀

黔陽縣志

卷之十八

學校二

二十四

龍標藏板

材鳩工而講堂成而大門啟復易內廳而新之兩廂  
二門及牆院以次畢役增置過廳門房各一而設門  
役以經守之氣象輝煌規模整肅邑人士咸感我侯  
之德而屬余爲文以記夫化民成俗教學爲先我侯  
吏治精勤百廢具舉而孜孜汲汲體

國家重學之意以興學此足與饒陳二公後先頡頏者  
矣諸生肄業於此者其尙朝斯夕斯共相砥礪使學  
成名立蔚爲一時楨榦之材庶無負我侯作育之盛  
意也與時乾隆丙午冬月記

附鄉飲酒禮

〔大清會典〕順治初令京府及直省府州縣每歲舉行鄉飲酒禮設賓僎介主酒席於存留錢糧內支辦凡以申明

朝廷之法敦叙長幼之節遂爲定制云

凡鄉飲酒儀在京府及直省府州縣凡歲正月十五日十月初一日於儒學行鄉飲酒禮前一日執事者於儒學之講堂依圖陳設坐次司正率執事習禮至日黎明執事者宰牲具饌主席及僚屬司正先詣學

黔陽縣志

卷之十八

學校二

二十五

龍標藏板

遣人速賓僎以下比至執事者先報曰賓至主席率僚屬出迎於庠門之外揖入主居東賓居西三揖三讓而後升堂東西相向立贊兩拜賓坐執事者又報曰僎至主席又率僚屬出迎揖讓升堂拜坐如前儀賓僎介至既就位執事者唱司正揚觶執事者引司正由西階升詣堂中北向立執事者唱賓僎以下皆立唱揖司正揖賓僎以下皆揖執事者以觶酌酒授司正司正舉酒曰恭惟

朝廷率由舊章敦崇禮教舉行鄉飲非爲飲食凡我長

幼各相勸勉爲臣盡忠爲子盡孝長幼有序兄弟友  
恭內睦宗族外和鄉里無或廢墜以忝所生讀畢執  
事者唱司正飲酒飲畢以觶授執事執事者唱揖司  
正揖賓僎以下皆揖司正復位賓僎以下皆坐唱讀  
律令執事者舉律令案於堂之中贊禮引讀律令者  
詣案前北面立唱賓僎以下皆立行揖禮如前讀畢  
復位執事者唱供饌案執事者舉饌案至賓前次僎  
次介次主三賓以下各以次舉訖執事者唱獻賓主  
起席北面立執事斟酒以授主主受爵詣賓前置於

黔陽縣志

卷之十八

學校二

二十六

龍標藏板

席稍退贊兩拜賓答拜訖執事又斟酒以授主主受  
爵詣僎前置於席交拜如前儀畢主退復位執事者  
唱賓酬酒賓退僎從之執事者斟酒授賓賓受爵詣  
主前置於席稍退贊兩拜賓僎主交拜訖各就位坐  
執事者分左右立介三賓衆賓以下以次斟酒於席  
訖執事者唱飲酒或三行或五行供湯又唱斟酒飲  
酒供湯三品畢執事者唱徹饌候徹饌案訖唱賓僎  
以下皆行禮僎主係屬居東賓介三賓衆賓居西贊  
兩拜訖唱送賓以次下堂分東西行仍三揖出庫門

而退。○主府知府州知州縣知縣如無正官佐貳官  
代位於東南次賓以致仕官爲之位於西北僎賓擇  
鄉里年高有德之人位於東北介以次長位於西南  
三賓以賓之次者爲之位於賓主介僎之後除賓僎  
外衆賓序齒列坐其僚屬則序爵司正以教職爲之  
主揚觶以罰贊禮者以老成生員爲之